



册府元龜  
卷之八十一



13  
849  
29





13  
849  
29



册府元龜

淮南李嗣京參闕

西極文翔鳳訂正

豫章黃國琦較釋

帝王部 八十

慶賜第二

唐太宗以武德九年八月甲子卽位於東宮大赦天下文武官五品已上先無爵者賜爵一級六品已下加勳一轉甲戌宴羣臣於顯德前殿賜帛各有差貞觀二年五月丙申以夏麥大稔讌羣臣奏九部樂



於庭賜物各有差

六月庚寅皇太子治生宴五品已上賜帛有差仍賜天下是月生者粟帛

九月壬子宴羣臣奏九部樂賜帛各有差賜天下大酺三日慶有年也

十一月甲子宴羣臣賜帛各有差

四年二月甲寅赦詔賜天下大酺五日己亥幸溫湯賜從官帛有差

三月戊辰宴三品以上於林光殿賜物各有差

七月辛卯太上皇不豫有瘳詔曰尚齒崇孝德教所

先饗餼是加食超嘗等諸州都督刺史及文武官人

老人八十已上并孝子旌表門閭者並宜節級賜物以申饗宴庶使萬國之內同此歡心施於四海皆知

朕意壬辰宴羣臣於芳華殿極歡而罷賜帛各有差十月幸隴州詔岐隴二州八十以上鰥寡篤疾及舊

任二州雜職佐史以上賜物各有差百歲已上就加優恤辛丑按獵於貴泉谷賜將士帛有差丁巳宴從

官及武功父老賜帛各有差帛各盡重而十二月乙未皇太子誕育宴三品已上於臨華殿賜

帛各有差



五年正月癸酉大蒐於昆明池甲戌宴羣臣賜從官  
帛各有差

巳卯幸左藏庫賜三品已上帛各盡重而出

四月甲辰宴羣臣賜帛各有差

八月巳卯以大有年賜羣臣羊酒宴樂於其家

十一月巳卯宴羣臣賜帛各有差

十二月丙午幸溫湯新豐賜高年帛有差

六年正月宴蠻夷及三品已上於百福殿賜帛各有

差

三月戊辰幸九成宮丁丑詔行經之所八十已上及

孝子順孫鰥寡惸獨賜以粟帛

戊寅宴三品已上於九成宮丹霄殿賜從官帛各有

差

四月癸卯醴泉出丹霄殿之西命公卿已上示之因

置酒於側賜帛各有差

七月宴三品以上於丹霄殿賜帛各有差

八月宴近臣於丹霄殿樓帝甚懽夜分乃散各賜錢

帛各有差

閏八月帝在岐州皇太子來朝丙申宴東宮官屬賜

帛各有差乙巳宴岐州父老賜帛各有差



九月幸慶善宮宴從官故老賜帛各有差

七年正月癸巳宴三品已上及州牧蠻夷於玄武門  
奏七德九功之舞蠻夷十餘種自請率舞詔許之久  
而乃罷賜帛各有差

八年二月丙午以皇太子承乾加元服降死罪已下  
五品已上子爲父後者賜爵一級天下大酺三日戊  
申宴羣臣賜帛各有差

九年正月甲申皇太子承乾納妃蘇氏宴羣臣賜帛  
各有差

十一年正月壬辰宴五品已上於兩儀殿賜帛各有

差戊辰宴長安父老於玄武門賜以穀帛

三月幸雒陽宮丙午宴從官賜物各有差癸卯宴雒  
陽父老於乾元殿賜以粟帛

十一月丙午宴五品已上及蕃夷於貞觀殿賜帛各  
有差

十二年二月壬子宴雒陽父老賜帛有差

十三年正月乙巳帝朝於獻陵三原縣人年八十已  
上及孝子順孫義夫節婦鰥寡惇獨有篤疾者賜物  
各有差宿衛陵邑中郎將齊士員及三原令已下各  
賜爵一級



十四年正月己酉宴羣臣及吐谷渾王河源王慕容諾曷鉢於玄武門賜物各有差甲寅幸魏王泰宅賜泰府寮及同里老人各有差

十二月賜酺三日

十五年正月辛巳如雒陽所過州賜高年篤疾穀帛有差

四月乙未詔雒州篤疾及鰥寡惇獨不能自存者各賜米兩石五月壬申并州道士及僧父老等二百人詣闕上表稱太原王業龍興之地登封禮畢伏願臨幸帝賜宴於武成殿各賜物而遣之

十六年十一月西狩於武功甲子賜所幸六縣高年篤疾惇獨齔被穀帛各有差是日幸慶善宮召武功之郿城立節三時豐義四鄉士女七十已上及居宮側數百人賜宴畢賜帛各有差

十七年四月丙戌詔立晉王爲皇太子又立晉王妃帝御承天門大赦文武職事九品已上及五品已上子爲父後者各加一級鰥寡惇獨篤疾之徒量加賑卹賜天下酺

六月甲午并州父老百餘人詣闕稱陛下發迹太原皇太子疏爵晉藩臣等不勝慶幸今來奉賀帝賜宴



冊府元龜 慶賜二  
及物以遣之

閏六月庚申薛延陀可汗突利設獻饌帝於相思殿  
大饗百寮盛陳寶器奏慶善破陳樂并十部之樂及  
檀末跳丸舞劍之技突利設再拜上千萬歲壽賜物  
各有差

十一月誕皇太孫宴宮寮於弘教殿賜物有差

是月以貞石表瑞赦制率土賜酺三日

十九年二月征遼所經州縣高年及鰥寡孤獨篤疾  
賜粟帛各有差

十月征遼班師次營州戊申詔營州刺史父老及契

丹等蕃長已下各頒賜絹綿綾錦數千萬段癸酉至  
幽州甲戌宴從官三品已上賜物有差

十二月辛酉帝在定州三品已上及四品中書門下  
四品以帝疾瘳詣閣上禮詔引文武五品已上預宴  
將夕乃罷賜物各有差

二十年正月帝自定州幸并州庚辰引從官及太原  
父老而宴之賜物各有差

二月詔遼海人無戰勲者汎加勲官一級乙未發并  
州庚申賜高年所過鰥寡孤獨篤疾粟各有差

七月帝疾愈宴五品已上於飛霜殿絲竹遞奏羣臣



上壽極歡而罷賜綾錦各有差

八月幸靈州庚辰至涇州賜高年及鰥寡孤獨篤疾粟帛各有差

二十一年正月甲寅以鐵勒諸部并爲州縣中外又安詔賜諸司及京城百姓大酺三日

二十二年正月己未奏十部樂會四夷君長於天成殿王公稱觴上壽賜帛各有差

三月丙辰至玉華宮賜行幸所過高年篤疾粟帛各有差

二十三年五月以其露降大赦天下八十已上各賜

粟帛鰥寡惇獨及篤疾者量加賑貸高宗以貞觀二

十三年六月甲戌朔卽位大赦天下内外文武賜勳

官一級

永徽三年正月丁亥率公卿耕於籍田賜羣官帛各有差

二月甲辰宴三品於百福殿極歡賜以錦綵各有差

三月丙辰御觀德殿陳逆人房遺愛等口馬資財爲

五塚引王公諸親蕃客及文武九品已上射

七月丁巳立陳王忠爲皇太子五品已上子爲父後

者賜勳一轉大酺三日



六年正月壬申親謁昭陵還行宮詔左監門員外將軍嘗基在此宿衛進爵一等陵令陵丞加各一階並節級賜物

二月乙巳皇太子忠加元服詔內外職事五品已上子爲父後者賜勳一級大酺三日

十月立武氏爲皇后大赦天下八十已上老人各賜粟二石綿三段百歲已上各賜粟五石錦十段鰥寡惸獨篤疾不能自存者量加賑卹

顯慶元年正月辛未立代王弘爲皇太子壬申大赦文武職事九品已上五品已上爲父後者各加勳官

一轉亡官失爵並宜量敘諸年八十已上各賜粟帛鰥寡惸孤篤疾之徒不能自存者量加賑卹賜天下大酺三日巳卯宴文武羣臣及朝集使蕃客京城老人八十已上賜物各有差

十一月乙丑皇太子顯生京職事九品已上及朝集使各加勳官一級仍賜宴賫物各有差

二年二月辛酉幸雒陽宮癸亥御貞觀殿宴從行文武官及雒州父老宗姓等賜物有差詔百歲已上各賜氈被一具袍一領綿絹十段粟二十石仍遣使就家存問九十已上各賜綿絹五段十月幸鄭州以高



祖在隋嘗收滎陽詔曰百姓免一年租賦八十已上老人及鰥寡惇獨等賜粟帛各有差

四年十月皇太子弘加元服大赦天下文武官職事五品已上子孫爲父祖後者各加勳官一級大酺三日

閏十月辛巳以駕幸東都詔所經處八十已上老人賜氈袍綿絹及粟有差

五年二月幸并州丙戌宴從官及諸親并州官屬父老賜帛有差賜酺三日

八月癸未以討平百濟賜天下大酺三日

龍朔二年七月丁亥以皇子旭輪滿月賜酺三日京官五品已上并諸親等爲誕皇太子上禮於是九品已上咸預宴樂賜物有差

麟德元年八月丁丑幸舊宅宴羣臣賜物有差

乾封元年正月戊辰朔有事於太山壬申御朝觀壇受朝賀大赦改元諸行從文武官及見朝觀岳牧二京留守并邊要州都督刺史三品已下並賜爵一等四品已下加授一階諸老人八十已上者版受刺史司馬縣令婦人版受郡縣君並節級量賜粟帛天下百姓年二十已上八十已下賜爵一級丁丑詔諸行



從文武官入見朝覲諸王岳牧二京留守及守捉邊  
要長官三品已上賜爵一等者宜更加爲二等四  
品已下九品已上更加一階等者七品已上宜加二  
階八品已下更加勳官一轉諸非行從內外職事官  
三品已上加爵一等四品已下各加一階

四月甲辰至京師是日御景雲閣宴羣臣設九部樂  
頒賜繒綵各有差

總章元年十月癸丑文武官獻食賀破高麗帝御玄  
武門之觀德殿宴百官設九部樂極歡而罷賜各有

二年九月幸岐州以高祖嘗爲扶風太守故曲赦岐  
州仍賜高年衣服粟帛各有差

咸亨四年七月庚午皇太子新宮成帝親逆太子入  
宮五品已上及諸親並從宴會奏樂極歡而止賜物  
有差

十月駕在九成宮乙未皇太子納妃裴氏禮畢曲赦  
岐州大酺

上元元年八月壬辰追尊宗廟大赦改元大酺三日  
帝御含元殿東翔鸞閣觀之時京城四縣及太嘗音  
樂分爲東西兩廂



二年正月勅内外文武官職事四品五品任經十年已上未得階及六品已下出身經十五年已上歷職清勤無殿犯者宜令所司具以名聞其有廉能著稱清苦奉公不須限以居職年月亦以名聞於是各賜一階

三年三月甲辰自汝州溫湯還東都詔免汝州田租之半八十已上老人節級賜帛

儀鳳三年七月丁巳宴百寮及諸親於九成宮之咸亨殿日晏而罷賜綵物有差

永隆元年八月乙丑立英王哲為皇太子改元大赦

大酺三日

二年二月辛巳特賜京官九品已上大酺三日

永淳元年二月癸未以太子誕皇孫滿月大赦改元大酺三日

弘道元年二月改元大赦老人年八十已上并婦並節級量賜粟帛孝子順孫義夫節婦表其門閭終身勿事鰥寡孤獨篤疾不能自存者量加賑給見任内外官五品已上經四考及守五考經三考六品已下計滿三考政有清勤狀無私犯者各加一階

中宗神龍元年正月丙午即位大赦内外文武官加



兩階三品已上加爵二等入五品等特減四考大酺五日

二月甲子立妃韋氏爲皇后大赦天下內外官預陪位者賜勳一轉大酺三日

九月壬午帝親祀明堂禮畢制京文武三品已上賜爵一級四品已上各加一階外文武官九品已上賜勳一轉皇親嗣王郡王仍許佩金魚袋內外職事官三品已上及四品清官并中書門下五品官父已亡者並量加追贈自弘道已前經任相三年已上及秦府晉府寮佐四品已上并食實封功臣雖經罪責不

至破家子孫無任京官者特宜優與一官英府周府舊寮五品已上子孫亦宜准此天下百姓爲父後者各賜爵一級大酺三日

十一月壬子帝謁太廟告謝受尊號之意大赦天下京官文武官及朝集使九品已上加一階三品已上賜爵一等外官九品已上賜勳一轉天下賜酺三日二年十月戊戌至自東都十一月乙巳大赦天下從官文武官九品已上賜爵

景龍元年九月受尊號禮畢赦詔改元文武官三品已上賜勳一轉



二年二月皇后言衣箱中裙上有五色雲起久而方  
歇帝令畫工圖其狀以示百寮仍大赦天下內外五  
品已上官母妻各加邑號一等十一月已卯安樂公  
主降武延秀禮畢大赦賜酺三日  
三年正月癸酉幸薦福寺賜從官帛有差  
八月已巳幸安樂公主山池宴從官賜繒帛有差  
十一月乙丑南郊大赦文武官及應集考使別勅陪  
位官遼州都督刺史諸軍大使副三品已上賜爵一  
等四品已上加一階應入三品者三品減四考五品  
減三考應入外文武官賜勳一轉天下大酺三日

十二月甲午幸新豐之溫湯從官賜勳一轉睿宗初  
為安國相王景龍四年六月庚子夜臨淄王平韋庶  
人辛丑相王奉少帝御安福門樓大赦内外文武官  
三品已上賜爵一等四品已上加一階應入五品不  
限以年考四等已下及諸親賜勳三轉  
唐隆元年甲辰即位大赦天下制内外官三品已上  
各加爵一等四品已下各加一階七月已巳册皇太  
子大赦天下内外文武官九品已上子承父後者各  
賜一轉  
景雲二年四月壬寅大赦天下京官四品已下加一



階外官賜勳一轉三品已上各賜爵一等天下大酺三日

八月乙卯以高祖舊宅枯柿樹重生天下賜酺三日  
太極元年正月戊子籍田乙丑大赦改元內外官四品已下加一階三品已上賜爵一級天下大酺三日  
延和元年五月戊寅親祀北郊改元內外官陪見大禮者賜勳一轉大酺五日

八月庚子傳位於皇太子甲辰大赦改元為先天內外官三品已上賜爵一級四品已下賜勳兩轉五品已上子為父後者賜勳一轉天下大酺五日

玄宗先天元年九月庚午御長樂門加諸王公主實封各有差三品已上各賜爵一級四品已下各加一階

二年七月誅左僕射竇懷貞等大赦天下文武官三品已下賜爵一級四品已下各加一階

九月庚辰宴王公百寮於天門賜物有差

開元元年十二月庚寅朔大赦改元內外官賜勳一轉

二年正月丁亥立皇太子大酺三日

五年二月甲戌行幸至東都制曰朕自臨天下未至



於雒雖二京出游蓋惟帝典五載來巡肇於卽事念  
茲扈從特有加恩南北衙應從官三品已上各賜物  
四十段四品二十段五品二十段六品七品十五段  
八品九品十段從飛騎萬騎各賜物五段馬家小兒  
賜物三段三衛檢校監門直長引駕等發京宿衛執  
當不闕者簡日優量其置頓營幕橋道等使各賜物  
遞加從官一等仍與中上考緣路刺史上佐縣令祇  
承頓事并專知客各准從官例與賜亦與中考衛士  
掌閑幕士等各賜物兩段

六年正月甲子隴右節度郭知運獲吐蕃獻俘特詔  
曰王者六師必存止殺國之二柄且貴先賞今吐蕃  
背盟我軍獻捷執訊獲醜以捨於平人歸馬休牛不  
資於國用利以和義思與卿大夫共之其馬及犂牛  
等並賜京文武五品已上清官及朝集使三品者所  
繇節級分與

十月癸亥帝將還西京御樓河南及懷汝鄭父老賜  
帛有差

十一月辛卯至自東都丙申親謁太廟下詔內外官  
三品已上有廟者賜絹三十四以修祭服俎豆緣謁  
廟亞獻郊王守禮終獻宋王憲各賜絹三百疋夾侍



岐王範薛王業各賜絹二百五十四自餘行禮及供  
三品已上賜絹一百六十疋四品一百四十疋五品  
一百二十疋六品一百疋七品八十疋八品六十疋  
九品四十疋鹵簿六引官各減一等押杖官又減一  
等攝官依本官給有兼充諸使者加一等兩京文武  
官并朝集使諸方通表一品七十段三品六十段四  
品五品五十段六品七品四十段九品三十段行從  
者加一等皇親諸親准品等禮儀置頓營幕使各賜  
物一百段副使八十段判官及修定儀注官各減使  
一分之二行所州縣刺史上佐縣令等各准行從官

與物其給賜人應兩處已上請者從一多紀焉准有  
廟官之賜聽兼給緣謁廟有所修造專當官及當頓  
官始末不絕者各賜一中上考行事齊郎及權補充  
者各賜物十段昇階者各賜十五段三衛飛騎萬騎  
并仗內無品人等賜五段十月正蕃衛士等各賜三  
段

七年十一月乙亥皇太子入國學行齒胄禮丙子詔  
曰儒道惟百王之政元良乃萬國之貞屬太學舉賢  
賓庭貢士當其謁講故行齒奠所以弘風闡教尚德  
尊師宜有頒錫以成光寵陪位官一品宜賜五十疋







老各賜物三段庚辰幸潞州詔曰朕巡狩晉陽觀風問俗肆觀羣后存問百年諸侯侍於境者抑惟故事今停蹕潞州勞以牛酒其外州刺史及巡駕父老道士僧尼等遠來至此頗亦艱辛宜並令預會刺史賜物四十疋父老已下各賜物三疋癸巳行幸北都詔太原府預宴官共賜物二千疋父老及吏人等共賜物一萬疋諸老年八十已上賜物五段版受上縣令仍賜緋九十已上賜物七段版授上州長史賜緋百歲已上各賜物十段版授上州刺史仍賜紫

二月壬子祠后土于汾陰之隰上太史奏榮光出河休氣四塞徘徊遶壇日揚其光有司奏脩壇掘地護古銅鼎二其大者容一斗色皆青又獲古甗長九寸上有篆書千秋萬歲字及長樂未央字又有赤兔見於壇側制曰自古受天之命作神之主崇德祀地盡孝配親存乎禮經不可闕也朕承累聖之緒仗卿士之力方隅清謐宇宙乂安北狩并都南轅汾上覽漢武故事修葺舊祠時惟仲春地氣萌動將先故本爲農祈穀齊戒惟寅粢盛惟潔仲尼曰吾不與祭如不祭豈非躬盡孝敬以致神祈乎而經始墮壇寶鼎出地奠茲幣玉榮先塞河將何以幽答神心上膺靈貺



朕又惟焉今大興克舉美祥允洽自天之祐豈予一人思與百辟同茲嘉慶亞獻邠王守禮終獻寧王憲各賜物七百疋申王撝岐王範薛王業各賜帛五百疋餘升壇官三品已上賜爵一等四品已下各加一階應入三品五品見任四品已上官先授三品四品已上階經三十考者六品已上官先授五品六品已上階經十六考者令所司勘責奏聽進止諸緣大禮有職掌官賜勲兩轉餘陪位官賜勲一轉中書門下三品六尚書御史大夫食實封三品已上功臣各與一子官其立功萬騎身亡沒者雖預創業不見盛時

念功思舊情有感惻並令所司檢勘亦各與一子官改汾陰縣爲寶鼎縣官同升壇官例賜一階

十一月戊寅親祠南郊大赦天下制升壇行事官及供奉官三品已上賜爵一級四品已下賜一階內外文武官及致仕并前資陪位者賜勲一轉親王公主各與一子官其諸軍節度大使及三都留守雖不陪位資寄旣重特宜同升壇官例百歲老人賜帛五段粟五石縣令至其家存問給付亞獻邠王守禮終獻寧王憲各賜物一千疋侍中源乾耀中書令張說兵部尚書同中書門下三品王峻各賜物五百疋三王



後賜物一百疋二品三品八十疋四品五品六十疋六品七品四十疋八品九品三十疋郡王縣主各賜物八十疋天下賜酺三日京城五日

十二年二月戊申大酺辛亥詔曰大酺之會與人同歡或慮遠方觀者來往狼狽其四夜竝宜開坊門府縣金吾嚴加捉搦

三月庚午宴朝集使於紫宸殿賜物有差

十三年東封十月庚午至濮州河南北五十里內父老皆獻牛酒還其牛酒各賜帛二疋遣之

十一月壬辰封禪禮畢大赦天下詔內外文武官三品已上賜爵一等四品已下賜一階邠王守禮寧王憲岐王範薛王業各與一子三品官公主嗣王郡王縣主各與一子官其應行從文武官加階之外竝賜勲兩轉孔子後褒聖侯優與處分天下致仕官各依本品賜一季祿及束帛諸蕃侯王酋長來會禮者各加一官天下賜酺三日丁酉徐曹亳汴許仙豫等州老父獻牛酒還其牛酒各賜帛二疋

十二月己巳至東都京兆父老及道士僧尼三百餘人詣闕拜賀共賜帛三百段遣之

十五年五月丁丑是日端午宴羣臣於武成殿各賜



衣一襲

十一月庚子御舍元殿宴羣臣賜帛有差

十六年十一月丙午御舍元殿宴羣臣賜帛有差

十七年十一月謁橋陵畢大赦諸州侍老百歲已上

賜帛十段九十已上賜五段八十已上賜三段獻陵

昭陵定陵官使并管陵縣官各別加一階內外賜文

武官三品已上加爵一等四品已下賜一階亞獻皇

太子鴻賜物二千疋終獻慶王潭賜物一千疋邠王

守禮寧王憲薛王業各賜物八百疋忠王浚隸王治

鄂王滉光王滉等各賜物七百疋中書門下賜物五

百疋開府王毛仲賜物三百疋皇親五等已上諸親

二等已上及文武百寮各賜物有差

十八年正月丁巳親迎氣於東郊詔賜亞獻皇太子

鴻賜物二千疋終獻寧王憲賜物一千疋文武百官

及有職掌等各賜束帛有差率土之內賜醕三日

十九年十一月壬子幸東都勅親王賜物八十疋嗣

郡王六十疋一品二品五十疋三品四十疋四品五

品三十疋六品七品二十疋八品九品十段三衛引

駕細引飛騎萬騎各四段彊騎弩手幕士主膳供膳

及諸色白身人等各三段知頓使知營使各六十疋



知頓御史四十疋知騎御史及知頓判官知營幕官  
賜物各加一等突厥吐蕃使共賜物五百疋令鴻臚  
等據蕃望高下節級分付供頓州百姓所緣頓差科  
及克夫匠雜祇供人等宜放今年地稅應定供頓縣  
官各與一中上考

二十年二月諸州朝集使還宴之朝堂送之賜帛各  
有差

十一月北巡狩庚申祀后土畢大赦天下諸州耆老  
百歲已上賜粟五石八十已上賜粟三石亞獻皇太  
子鴻賜物二千疋終獻慶王潭賜物一千疋郟王守

禮寧王憲薛王業各賜物一千疋忠王浚已下各賜  
物三百疋裴光庭蕭嵩弼亮朕躬弘益思遠不有優  
異何殊等夷加階賜爵之外各與一子官仍各賜物  
三百疋二王後及長公主嗣主郡主縣主各賜物二  
百疋行從文武官並節級賜物升壇官三品已上特  
賜一階應入三品五品官階相當不限考數緣大禮  
有職掌官賜勳三轉內外文武官三品已上賜爵一  
等四品已下各加一階致仕官賜物有差從蕃客共  
賜物五十疋管壇一鄉百姓給復二年武德初功臣  
每有大慶必存追遠業參運始而義合賞延其子孫



沉翳無在朝者宜令勘責卽與官唐元立功等艱難之際誠効益深言念其功豈忘終始其三品已上各賜一子官五品已上各賜紫金魚袋有亡沒者優贈與官仍與一子官兩京留守京兆河南尹四大都督府長史諸軍節度副大使准行從官例處分率土之內賜醮三日

二十一年五月戊子以皇太子納妃詔京文武九品已上賜勲一轉諸司緣禮會祇供官等更加一轉五禮使兵部尚書兼中書令蕭嵩特封徐國公禮會使黃門侍郎同中書門下平章事韓休特與三品禮會

使少府監馮紹賜紫金魚袋皇太子舅尚輦奉御趙廻遵特與三品官前右威衛曹騎趙廻進特與五品及五品官皇太子侍讀侍書等各加一等階其皇太子諭德潘肅特與五品官太子妃通事舍人薛愿特與五品及五品官今日應預會官等各節級賜物卽宜領取宴慰者所以宣其情頒錫者所以將其意公卿百辟庶知朕心

二十三年正月乙亥籍田禮畢亞獻皇太子鴻賜物二千疋終獻慶王潭邠王守禮等各賜物一千疋忠王浚已下各賜物三百疋汝陽郡王淳已下各賜物



二百疋裴耀卿張九齡李林甫自其翊贊誠有忠益  
頒賞以序等數須優各與一子官賜物三百疋二王  
後各賜物一百疋長公主各與一子官仍各賜物二  
百疋嗣王郡主縣主各賜物一百五十疋京文武官  
九品已上三都留守諸道採訪使及節度使賜物有  
差管籍田縣令更賜物六十疋京文武官及朝集使  
諸道節度採訪使新除五品已上官未赴任議縣令  
見在陪位者三品已上賜爵一級四品已下加一階  
皇親諸親并内外文武官九品已上各賜勳一轉蕃  
官應陪位者共賜物五十疋都城之內賜醪三日

九月辛巳宴朝集使於朝堂賜物有差

二十四年八月壬子千秋節御廣遠樓宴羣臣賜物  
有差又召京兆父老等宴之勅竝宜坐食食訖樂飲  
兼賜少物宴訖領取

十月甲子自東都還至陝州詔行從飛騎萬騎三衛  
引駕監門各賜物五段兵曠掌閑及諸色當蕃人各  
賜物三段緣路供頓刺史縣令及專知官各賜一中  
上考行從有職掌武官賜勳一轉

二十六年正月丁丑親迎氣於東郊禮畢制亞獻忠  
王興宜賜物一千疋終獻穎王璲及邠王守禮寧王



憲各五百疋慶王琮已下及長公主郡縣主二王後  
京文武官賜帛各有差天下諸州侍老宜令所繇長  
官量賜酒肉務存優養

七月己巳册忠王璵爲皇太子大赦天下制内外文  
武職事官九品已上各賜勳一轉五品已上子爲父  
後者亦賜勳一轉其忠王府官及侍讀侍書除普賜  
之外三品已上賜爵一級四品已下各加一階仍並  
卽與改轉緣册命行禮官各賜物有差今月番見上  
飛騎萬門直長三衛駕細引執扇黃衣長上等各賜  
勳一轉驍騎番兵各放免一番天下侍老八十已上

各賜粟三石帛三段百歲已上賜粟五石綿帛五疋  
並加版授率土之内賜脯三日  
二十七年二月己巳加尊號大赦詔皇太子璵男及  
慶王琮已下男宜並封授官邠王守禮寧王憲各與  
一子三品官其内外文武官三品已上賜爵一級四  
品已下各加一階長公主公主及嗣王郡王各與一  
子官郡主縣主各放一子出身二王後及諸方蕃客  
宜各賜物諸致仕官量與進改依前致仕天下侍老  
百歲已上版授下州刺史婦人版授郡君賜粟五石  
綿帛五段九十已上版授上州司馬婦人版授縣君



賜粟三石綿帛三段八十已上版授縣令婦人版授鄉君賜粟兩石綿帛兩段京城父老等宜共賜物三千段僧道等賜物一萬疋率土之內賜醕五日  
二十八八年八月已未以降誕之日御花萼樓宴羣臣賜帛有差

二十九年五月帝夢玄元皇帝告以休期盡真容分布天下制曰今者真容應見古所未聞福雖始於邦家慶宜均於士庶其親王公主郡縣主及内外文武官等並量賜錢至休假之辰宜以素食用申慶樂諸道節度使及將士等亦准此其兩京及諸州父老亦

量賜錢同此權宴其錢以當處官物充

天寶元年正月改元大赦天下耆老八十已上者宜委州縣官每加存問仍量賜粟帛内外文武官九品已上各賜勳兩轉

三月丙申合祭天地於南郊制文武官三品已上加一爵四品已下加一階

三年十二月癸丑親祀九宮貴神禮畢詔天下耆老百歲已下賜綿帛五段粟三石八十已上三段粟兩石仍令郡縣長官存問給付亞獻太子璵宜賜物二千疋終獻慶王琮一千疋正衣夾侍各五百疋親王



九月... 慶賜二...  
各三百疋新封建郡王及國公一百疋賢妃三百疋  
長公主各三百疋公主各二百疋嗣郡王各一百疋  
中書門下三品竭心翊戴引益實多各與一子官如  
先已授官量與一人改轉内外文武官三品已上賜  
爵一級四品已下各加一階一品賜物七十疋三品  
已上六十疋五品已上賜物四十疋六品已下二十  
段諸道節度使各賜物一百疋三京留守及二主後  
各八十疋採訪使各六十疋諸蕃客共賜二千疋其  
唐元功臣締構之初竭其忠款錄加念舊情所不忘  
普恩之外更加一階其身歿者各贈一官皇親五等

已上及九廟子孫諸親三等已上未出身其前資者  
選日稍優與處分見任者更賜勲兩轉應天下賜醕

三日

六年正月戊子親祀南郊禮畢詔天下耆老百歲已  
上賜綿帛五段粟三石八十已上綿帛三段粟二石  
仍令所在長官存問各卽分付亞獻太子與賜物二  
千疋終獻慶王琮賜物一千疋京文武官各賜帛有  
差天下賜醕三日

七年五月册尊號畢詔曰且因親設教式本於人倫  
自葉流根必逮於營養内外文武職掌官有五品已



上其父祖見在無官者宜各授一官仍聽致仕其祖母見在准母例處分京官五品已下正員如父母已沒未有官者亦宜追贈所司勘會卽與處分王澤無私豈殊於中外天瑞有慶類屬於京華寬大之典則以溥覃施惠之恩特申曲被其京城父老宜各賜物十段七十已上仍版授本縣令其妻版授縣君六十已上版授本縣丞天下耆老百歲已上版授下郡太守婦人版授郡君九十已上版授上郡司馬婦人版授縣君八十已上版授縣令婦人版授鄉君仍並卽量賜酒麵內外見存文武官九品已上宜各賜勲兩

轉其京文武官見在京及致仕并陪位官諸方通表

使及月蕃官等一品賜物一百疋二品三品八十疋四品五品五十疋六品七品三十段八品九品二十段兩京留守各八十疋其節度採訪使并諸官充使未廻者並同在京例賜物皇太子諱更宜賜物二千疋慶王琮已上各賜物有差率土之內賜醕三日八載閏八月受冊尊號大赦制曰朕永惟風毅漸冀還淳至於弘貸之名亦思復古其天下百姓大夫戶頭者宜各賜爵一級天下侍老並量賜酒麵內外見任文武職掌官三品已上賜爵一級四品已下各加



一階其有文武官在京及諸色倍位官通表使等賜帛有差率土之內賜酺三日

十年正月甲子有事於南郊大赦天下京官五品已上正員清資官階相當并五品已上正員外清官父母先亡歿無官號者竝與追贈又父有封爵合傳授子孫或緣申請遲違准式遂停承襲如有此色自開元已來宜令所司審加勘責灼然合襲者特宜許襲太清宮道士各賜物三十段陪位道士共賜物五百段亞獻皇太子賜物二千疋終獻榮王琬賜物一千段文武百官及有職掌各賜束帛有差率土之內賜

酺三日

十三年二月受冊尊號大赦制曰朕尊崇先謚霜露增感于以孝思無忘錫類其內外見任官官階俱是三品已上父未有五品官及無官已亡沒者宜各贈五品官及母無邑號者亦與追贈其見任四品五品清官官階俱是五品已上者亡父母先無官號亦准此追贈天下侍老百歲已上版授本郡太守婦人版授郡君各賜綿帛五段粟三石八十已上版授本縣令婦人版授縣君各賜綿帛兩段粟二石太清宮闕聖祖先居頻告休徵屢貽啓迪不有優異豈表殊嘗



其本宮道士宜各賜物三十段道門威儀五虛貞賜物五十段陪位大德各賜物二十段因心推崇增上美謚惟官統職必在正名今以太帝尊事宗廟安可例署爲名禮不逼尊情期達敬五陵署改爲臺獻陵臺等五令及丞並升一階以彰崇奉亞獻皇太子璵賜物一千段終獻榮王琬賜物五百段其餘各賜階爵有差其郡守縣令職守親人必在公勤用康黎庶凡所推擇皆竭廼誠寵錫之門須甄異等普恩之外太守等並賜爵一級縣令賜勳兩轉庶其勉勵以表朕心其京文武官一品賜物一百疋二品八十疋三

品七十疋四品五品五十疋六品七品各三十疋八品九品二十段東京北京留守節度採訪使并京官准勅出使未廻者所賜物並同見在例左相陳希烈純粹之道載穆朝廷文儒之風式瞻師表且叶和時令胡贊昇平柔嘉其德克壯元老與一子五品官賜物五百疋攝太尉莫瓚上册書寶冊讀冊右相楊國忠宜與一子三品仍與一子五品官更賜物五百段左僕射安祿山旣押登歌又押寶冊與一子官更賜物四百疋攝太尉張均太清宮祠及脩儀注等使普恩之外又賜物一百疋武德功臣及貞觀初宰輔等



緬想忠義感會風雲用集大勳肇興王業其有子孫  
零落冠冕陵夷無任官者宜令所司勘責依資與一  
人京官唐初功臣續參締構錄勞念舊每宴於懷普  
恩之外宜放一子出身所司依資與一官率土之內  
賜醮三日

三月丙午宴躍龍殿門賜右相楊國忠絹一千五百  
疋綵羅三百疋綵綾五百疋左相陳希烈絹三百疋  
綵羅綾各五十疋餘三品八十疋四品五品六十疋  
六品七品四十疋

十四年八月天長節詔南衙九品已上并京兆府畿  
令等宜共賜物二萬疋左右龍武軍各賜一千疋其  
唐元功臣言念勲舊宜異嘗倫兩軍各賜物二千疋  
餘各有差天下侍老各量賜米

肅宗至德元年七月卽位於靈武詔天下耆壽各賜  
物五段諸百姓本道採訪使差郡縣存問四方將士  
各賜馬一疋六品已下賜物十段天下寺觀各度十  
人内外文武官九品已上各加兩階賜勳兩轉三品  
已上賜爵一級

八月上皇至蜀郡大赦天下左相韋見素進封函國  
公特加一階兼文部尚書平章事房琯中書侍郎平



冊封元龜慶賜二  
章事崔圓竝賜特進三品門下侍郎平章事崔渙賜  
四品驃騎大將軍內侍監知內侍省事渤海郡公高  
力士加開府儀同三司進封齊國公左龍武大將軍  
潁川郡公陳玄禮加開府儀同三司進封潁國公朝  
臣扈從衣緋者賜紫綠者賜緋竝量加進封

十二月戊午帝御丹鳳門大赦天下詔五品已上清  
資官及三品已上官上郡太守父見任無官及官卑  
竝與五品官及祖先亡沒者贈一人官祖母亡沒亦  
贈邑號天下侍老八十已上版授有差竝賜緋魚袋  
内外文武三品已下各加一階應敘三品五品量加

兩考蜀郡鳳翔扈從官九品已上更賜勳一轉溥天  
之下賜酺五日

乾元元年二月乙巳受冊尊號大赦改元詔内外文  
武官有三品已上各賜爵一級四品已下及四方通  
表使各加一階五品已上有父歿者各賜勳兩階

四月甲寅郊廟禮畢乙卯御丹鳳門大赦天下詔曰  
其成都府元從聖皇功臣及靈武元從功臣并收兩  
京將士京留守諸道節度採訪使普恩外三品已上  
賜爵一級四品已下加一階門人賜勳三轉二王三  
恪各與一子官内外文武官三品已上賜爵一級四



品已下加一階

八月甲辰天長節上皇於金明樓宴百官賜綵五百疋

十月甲辰冊成王俶爲皇太子大赦天下詔文武官三品已上賜爵一級四品已下各加一階五品已上官子爲父後者賜勳兩轉頃緣國用不足頒賜未周今所鑄新錢數盈於萬其京官文武兩品已上及嘗參官六軍將士東京留守及諸道節度將士等各賜物有差其唐元功臣成都元從及朕元從功臣等普恩之外更賜一爵四品已下更加兩階其在靈州

及寧州至鳳翔者仰所司類例更遞加一等皇親及諸色陪位人各賜勳兩轉其鴻臚蕃客共賜絹一千疋應緣冊禮職掌要重者及撰冊昇寶官禮官等普恩之外賜勳兩轉其禮儀使特賜一階副使普恩之外賜爵一級勅文有不該者所司類例奏聞

二年九月丙寅帝降誕日宴百官於宣政殿賜絹三十疋

上元元年閏四月己卯御明鳳門大赦改元詔內外文武官賜爵各有差其六軍及飛龍閑廐加賜物其成都靈武元從扈從遞加有差見在諸軍各加錄賞



物陣亡將士優加褒贈行人家口所在賑給

二年九月壬寅大赦制自今已後但稱元年以今年

十一月為歲首每月以所建為數內外官三品已上

賜爵一級四品五品各加一階六品已下賜勳兩轉

成都府及靈武元從普恩之外三品已下更加賜爵

一級四品更加一階六品已下更賜勳一轉京文武

官等賜物各有差天下侍老先版授者改與版授未

版授者與版授

元年建卯月辛亥大赦制内外文武官三品已上賜

爵一級四品已下各加一階成都靈武元從功臣三

品已上更賜爵一級四品已下更加一階其京清資

正員文武五品已上武官三品已上并兩省供奉官

御史諸州刺史并諸道節度已下三品已上父母亡

沒未經追贈者並量與追贈



册府元龜

淮南李嗣京叅閱

西極文翔鳳訂正

豫章黃國琦較釋

帝王部

八十一

慶賜第三

唐代宗以寶應元年四月卽位五月丁酉大赦詔諸州刺史與一子官刺史縣令入五品減兩考內外文武官三品已上賜爵一級四品已下各加一階諸州刺史父母在無官者與致仕官及母邑號已亡歿者



追贈天下子為父後者各賜勳一轉

廣德元年七月壬子受冊尊號大赦改元制內外文武三品已上賜爵一級四品已下加階仍各賜勳兩轉文武正員嘗參官并諸州刺史父母無官邑者宜與致仕及邑號賜者更與改贈

二年二月乙亥親拜南郊戊子御明鳳門大赦內外文武三品已上賜爵一級四品已下各加一階仍並賜勳兩轉武德元從功臣勳業特崇子孫沈翳者委所司勘責各與一人官成都靈武元從普恩之外三品已上更賜一級四品已下更加一階資應功臣普

恩之外三品已上各與一子六品官賜爵一級四品已下各加兩階更賜勳兩轉五品已上官子為父後者賜勳兩轉副元帥光弼子儀各與一子三品官并階諸道節度使各與一子五品官并階都防禦使及經略等使各與一子六品官并階去歲行幸陝州六軍英武威遠威武寶應射生衙前射生左右步軍等并内外文武百官扈從到行在者三品已上與一子官四品已下各加兩階自陝州至上都已來置頓使及州府長官普恩外各與一子出身置頓使判官已下緣路縣令及專知頓使各加一階其六軍神策寶



應射生衙前射生及左右步軍英武威遠威武等諸軍左右金吾將士緣大禮扈從及在城留後者共賜金錢五萬貫鴻臚蕃客共賜錢一千貫儀王及彭王已下諸王男未有官者並准舊例與官其已封為郡王國公者及永穆長樂已下長公主及諸郡縣王并嗣王郡王各與一子官皇親五等已上諸親三等已上各與一子出身二王之後各與一子官應緣大禮應升壇殿行事者普恩之外更與一子官應在太清宮郊廟諸色職掌者及冊皇太子行事官撰冊并書冊文及簡較造冊官普恩之外三品已上賜爵一級四

品已上加一階仍賜勳一轉

永泰元年正月癸巳朔御含元殿大赦改元應見立仗諸軍將士等宜共賜錢五萬貫

大曆元年十一月甲子日長至御含元殿大赦改元其立仗將士等宜賜物五百疋

德宗以大曆十四年五月卽位六月己亥朔御丹鳳樓大赦天下内外文武官三品已上賜爵一級四品已下加一階致仕官同見任天下百姓為戶者賜右爵一級内外將士及方面連帥並加官及勳封等在城諸將士各賜繒帛



建中元年正月辛未拜郊廟禮畢御丹鳳樓大赦天下內外文武官賜爵及階勳天下子爲父後者賜勳兩轉

興元元年正月癸酉朔帝在奉天大赦改元詔應赴奉天并進收京城將士并賜名奉天定難功臣身有過犯減罪三等子孫過犯減罪二等

六月癸丑詔興元府見任官各加兩階耆老與版授本縣令仍賜緋興元鳳州界內知頃脩橋閣路官等委巖震類例功效聞奏當與甄獎

七月丙子次鳳翔詔鳳翔府耆壽侍老人十已上各與版授刺史仍賜紫餘並與版授上佐仍賜緋府縣知頃官考滿日放選是月辛卯御樓大赦內外文武及致仕官三品已上賜爵一級四品已下加一階仍并賜勳兩轉司徒兼中書令晟與一子五品正員京官侍中瑊與一子六品正員京官駱元光尚可孤韓遊瓌戴休顏各與一子七品正員官諸道節度使及行在都知兵馬使都虞候扈從左右金吾六軍大將軍各與一子八品正員官都團練使觀察使各與一子官收京城將士超八資改轉已甄叙者更與超三資扈從及收京城將士及嘗參官祖父母在先無官封



量授致仕官及邑號已亡者與追贈扈從將士三品  
已上賜爵兩級四品已下各加兩階賜勳三轉諸道  
刺史普加恩外賜爵一級諸道鎮軍及行營將士三  
品已上賜爵一級四品已下加一階宣示中外咸知  
朕意

貞元元年正月丁酉朔御含元殿大赦改元應從奉  
天及收城將士以府庫空竭減六官百司經費據見  
漕運財賦隨到者賞賜之

十一月癸卯日南至南郊禮畢詔內外文武見任及  
致仕官三品已上賜爵一級四品已下加一階天下

諸使軍將士三品已上亦賜爵一級四品已下加一  
階白身人賜勳三轉應奉天興元元年扈從立功并  
收京城將士食封者各隨文武與一子官餘並加兩  
階仍賜勳三轉其文武百僚應從到興元府者五品  
已上賜勳三轉其五品已下賜爵一級六品已下加  
一階合入三品五品者不拘考限聽叙其中五品已  
上父母未經追贈者並與追贈大長公主各與一子  
七品官嗣王郡王縣主各與一子出身應陪位皇親  
三品已上賜爵一級四品五品加一階六品已下及  
嘗選散官者簡選日優與處分應緣大禮職掌行事



冊府元龜 卷之八十一  
慶賜三  
官及留守副留守內行事中官等三品已上各賜爵  
一級四品已下加一階仍並賜勳兩轉介公鄒公各  
與一子官如無子孫賜物一百疋神策六軍殿前射  
生英武威威武遠皇城左右金吾衛使等諸軍諸使  
將士御樓立仗及守本仗者并諸道節度下隨使赴  
上都帖仗將士等宜共賜物十三萬段仍賜勳兩轉  
四年正月庚戌御殿大赦諸軍立仗將士共賜十萬  
疋陪位蕃客賜一千疋天下刺史與一子正真官戶  
口增加田疇廣闢者長吏加一階縣令減選優與處  
分

十一月庚午日南至南郊禮畢詔內外文武及致仕  
官并諸軍將士等三品已上賜爵一級四品已下加  
一階大禮行事官各加一階立仗將士及守本營者  
共賜帛十八萬端疋

九年十一月乙酉日南至郊祀禮畢大赦天下內外  
文武見任及致仕并諸軍諸使將士等三品已上賜  
爵一級四品已下加一階將士白身者賜勳兩轉應  
緣大禮職掌行軍六駕南郊後留守副留守及太倉  
左藏庫及陪位官等三品已上更賜爵一級四品已  
下加一階其郊壇官廟行事官各賜勳兩轉皇親應



陪位者三品已上賜爵一級四品已下加一階及諸色應陪位官等各賜勳兩轉親王大長公主王嗣主郡縣王鄔公介公鴻臚蕃客神威六軍及諸使應緣大禮宿衛御樓立仗及守本軍本營者諸道節度在京帖仗將士賜物有差宰輔及在方鎮者祖父各與追贈東都留守諸軍節度觀察都防禦都團練經畧鹽鉄轉運使左右神策神威六軍等統軍大將軍英武威遠軍使戶部侍郎判度支及京文武三品已上正員官尚書省四品官中書門下省御史臺五品官父在未有官者量授簡轄官有官者加一階母在

未有邑號者授邑號已有邑號者更進邑號父母亡歿者各與追贈應諸軍防秋兵馬使及別勅定名充邊地兵馬使等備禦勤勞所宜優異其父在未有官者各授簡較官母在未有邑號者各授邑號邊軍鎮守及諸道諸軍防秋將士經三周年未改轉者宜與甄叙

順宗以貞元二十一年正月卽位赦制內外文武見任及致仕官并諸道將士等賜爵加階賜勳有差二王三恪褒聖侯各與一子官大長公主嗣王等各與一子官及出身有差宗子中有才用者委宗正卿以



名聞量才叙用皇王等已上親賜爵加階有差陪位者年十五已上并放出身諸州府長官及京長參官父見在未有官者並與五品致仕官及階父歿者母存者與邑號父母亡歿量與追贈陝州元從寶應功臣興元元從奉天定難功臣賜爵勳有差亡歿者與追贈中書門下節度使東都留守度支鹽鈔等使京兆尹觀察招討等使及神策神威金吾六軍將士大將軍英武威遠鎮國軍使隴右經略軍使節度留後各與一子官有差其神策神威六軍將軍大將士英武軍等使并與加官神策神威六軍英武威遠營左右

金吾及皇城將士及緣御樓立仗將士等賜物及爵階有差應東官官及侍讀侍書授在正月二十六日已前者國喪已來職掌行事及冊命官受顧命撰制詔及脩冊文并寫制詔官等賜爵加階勳進改有差蕃客等共賜物一千八百七十疋義武軍節度使下官健在城立仗共賜物三千八百四十五疋立仗將士等量加改轉內侍省及內坊官正諸道進奏院及奏事官賜爵階勳有差百姓九十已上版授及賜各有差又冊皇太子詔文武官常參及諸州府長官子爲父後者賜勳兩轉



憲宗元和元年正月丁卯御丹鳳樓大赦內外文武見任及致仕官神策六軍諸道將士等各賜爵階勳有武德已來功臣子孫與官及出身文武嘗參官觀察節度團練經略使刺史六軍大將等父母亡歿與封贈至德已來任宰輔與追贈及謚陝州奉天元從功臣恩外更賜勳爵

二年正月辛卯有事於南郊還御丹鳳樓大赦天下制內外文武見任及致仕官諸軍將士等以品秩節級賜勳爵文宣公及二王三恪公主諸王與一子官及賜物有差諸軍立仗及在本營節級賜物應緣大

禮職事官並賜階爵天下百姓高年者賜米麥羊酒及版授官

四年十月冊鄧王寧爲皇太子大赦天下文武常參官及諸州府長官子爲父後者賜勳兩轉應緣冊禮行事官賜階及勳爵有差鄧王府官量與進改

七年十月壬寅冊遂王爲皇太子庾戍制文武嘗參官及諸州府長官子爲父後者賜勳兩轉應緣冊皇太子行事官加階賜勳爵有差文武嘗參官及陪位官并宗子親賜勳一轉遂王府官量與進改

十三年正月乙酉御含元殿受朝賀畢御丹鳳樓大



赦詔二王三恪及文宣公各賜物五十疋神策六軍  
威遠金吾及皇城等緣御樓立仗將士等及在城內  
蕃客各賜布有差中書門下及文武嘗參官諸道節  
度觀察神策諸軍等使祖父母父母節級與贈官封  
存者量與致仕官及邑號天下百姓高年賜束帛羊  
酒有差

十四年七月己丑御宣政殿受冊尊號大赦天下內  
外文武見任及致仕官三品已上賜爵一級四品已  
下加一階仍賜勳兩轉神策六軍金吾皇城威遠等  
諸軍應在城內蕃客並節級賜物侍中韓弘讀冊官

崔群讀寶官皇甫鑄並各加一階已至三品者賜爵  
二級撰冊文官崔群與一子正員官其餘應職掌行  
事官加階賜爵賜勳有差寶應興元功臣各賜勳爵  
天下百姓高年者頒賜有差

穆宗以元和十五年正月卽位二月丁丑御丹鳳樓  
大赦詔內外文武見任及致仕官三品已上賜爵一  
級四品已下各加一階諸道軍將士等普恩之外賜  
階爵有差二王三恪文宣公及公主縣主嗣王節級  
賜與一子官及出身宗子才行者委以名聞奏仍委  
中書門下量才叙用皇王等已上親皇太后二等已



上親並賜階爵中書門下諸道節度使諸州府長官  
東都留守及京嘗參官諸軍使等父母並節級與追  
贈父母存者與官封已經追贈者更與改贈在城諸  
軍將士節級賞賜仍加階爵京西京北及鎮武天德  
八道節級都防禦使下及神策一十二鎮將士等共  
一十八萬六千七百餘人都賜物一萬八千八百餘  
疋皇太后諸親委中書門下量等第節級優賞文武  
嘗參官及外官職事五品以上有母者並加邑號如  
已至郡太夫人者許迴授周親應緣皇太后冊禮職  
事官並節級賜物天下百姓有祖父母父母高年者

賜束帛城內蕃客等並節級賜物今年正月二十八  
日至閏正月三日宮苑諸門守捉西內立仗將士等  
量加改轉應內侍省及內坊官正等并賜勳爵  
九月辛丑幸魚藻宮大張樂觀競渡貴戚左右泊倡  
優角抵市肆百戲皆厚頒賜賚

十一月制王承元願赴闕庭宜令諫議大夫鄭覃往  
鎮州宣慰其四州之內有高年孤獨或承平遺老風  
觀皇風或孤獨廢疾不能自存者差官就問量給粟  
帛

長慶元年正月辛丑郊禋禮畢大赦天下內外文武



及致仕官三品已上賜爵一級四品已下各加一階  
陪位白身人賜勳兩轉陝州奉先興元功臣更賜爵  
有差身歿未經追贈應緣大祀移仗宿衛御樓立仗  
將士普恩之外賜爵勳有差仍准舊例賜錢物二十  
萬四千九百六十端疋貫大禮職掌行事官及留守  
等更賜勳爵及加階升壇殿行事官更特如一階應  
在城內蕃客等賜物有差天下百姓高年者賜米及  
綿絹有差

三月以盧龍軍節度使劉總請代詔曰劉總已極上  
台仍移重鎮兄弟子姪各授官榮大將賓寮亦宜超  
擢百姓復一年宜賜軍士錢百萬貫以內庫錢充仍  
令宣慰使給事中薛存慶親論朝旨與節度使丞相  
張弘靖計會大將判官甄獎未及有父母在者並具  
名列上郡縣中有殘破甚者量便宜優卹管內高年  
孀獨廢不能自存者差官就問給賜粟帛

七月壬子受冊尊號禮畢御丹鳳樓大赦內外交武  
見任并致仕官賜官爵有差神策六軍金吾威遠皇  
城將士普恩之外各賜勳三轉大長公主長公主公  
主嗣王郡王縣主神策六軍金吾威遠皇城等諸軍  
將統軍以下并將士等長行立仗及守本軍本營者



各賜物有差鴻臚禮賓院庶在城內蕃客等並節級  
賜物陰山貴女來迓天孫會王明庭克觀盛典念吾  
妹之將遠於禮賓而宜加其迴鶻公主別有賜物攝  
侍中讀寶官戶部侍郎平章事杜元穎讀冊官中書  
侍郎平章崔植各加一階撰冊文官與一子正員官  
冊奉寶授書玉冊官書寶官各加兩階進寶綬進冊  
進中嚴外辨禮儀贊道押冊寶綬昇寶冊官各加一  
階其餘應職掌行事官并寫制書官大常備撰儀注  
禮官并內定行事中使三品已上賜爵一級四品已  
下加一階仍并賜勳兩轉鑄造玉冊并填金字造寶

裝寶官等各賜物五十段尊師重傅有國嘗經李逢  
吉常綬薛倣丁公著等普恩之外各加一階如已至  
三品四品者賜爵一級天下百姓年九十已上委所  
在長吏量加存問

二年十二月丙子冊景王爲皇太子癸丑詔文武嘗  
參及諸州府長官子爲父後者賜勳兩轉緣冊太子  
攝太尉稱賀攝侍中承旨宣制進中嚴外辨攝中書  
令讀冊授冊各賜爵一級其行事職掌官及書寶引  
冊寶昇舉冊寶儀禮使禮官等三品已上賜爵一級  
四品已下加一階撰冊文官特加一階仍並賜物有



差導引官各加一階鑄造冊寶及禮生等賜勳有差

文武嘗參及陪位官并宗子諸親賜勳一轉

敬宗以長慶四年正月丙子卽位詔曰朕以寡昧祇

膺寶位載懷悼懼豈所克堪而羽衛爪牙禁營師旅

晝巡夜警協力悉心自始御哀至於踐祚忠勤匪懈

誠節用彰將圖錫賚務欲豐厚屬頻年旱歉御府空

虛如聞邊上將士至今未給衣賜永言軫慮深切寤

懷霑卹之時所期均濟兩軍官健各宜賜緡十疋錢

十千畿內諸鎮各賜緡十疋錢五千軍吏及城內諸

軍賞物節級有等仍於內庫更出綾緡共三萬疋度

支充邊軍春衣并天下州府賦稅如要蠲放者并委

所司約此數均勘取濟凡百將士宜悉朕懷

元和十五年

宗卽位賞賜過差左右神策軍各給錢五十貫諸軍及外鎮所降無幾將吏之錫又倍焉至是宰臣請量物力稱循往例時議美之

丁丑分命中使宣賜宰臣及給事中中

書舍人錦綵金銀器有差以冊日行事寵錫也又賜

諸內長官及扈從至左右軍供奉官錦綵銀器有差

文宗以寶曆二年十二月乙巳卽位賜左右軍中尉

樞密使供奉內官等錦綵銀器有差戊申帝始聽政

尊聖母為皇太后賜書事官錦綵銀器有差宰臣翰

林學士錦綵銀器有差以脩冊文宣教令故也賜少



陽院宿直官健共四百人錢各二十五貫絹二十五疋於槐林卓隊左右軍各五千人絹各十五疋錢十五貫又長行各錢十貫絹十疋左右三軍長行絹各十疋錢五貫左右金吾皇城威遠飛龍官健等各絹五疋錢五百文

太和元年正月乙巳御丹鳳樓大赦改元其去年十二月九日立功將士普恩之外三品已上更賜爵一級四品已下更加一階其赴難軍使兵馬使都虞候將士等仍各與改轉名銜聞奏

七年八月甲申冊魯王永為皇太子制文武嘗參官

及諸州府長官子為父後者賜勳兩轉應緣冊禮行事官賜爵加階賜勳并賜物有差魯王府官未經進改者量與進改

開成元年正月辛丑朔御宣政殿改元大赦應內外

文武進階加爵有差

臣欽若等曰自武宗至哀帝無實錄帝紀惟書大赦及錄文言

簡赦文未獲故會昌已後慶賜之事多闕文

昭宗龍紀元年正月癸巳朔御武成殿大赦改元中外文武臣寮進秩頒爵有差

天祐元年閏四月帝遷都維揚乙巳御光政門大赦改元應脩都諸色工匠人夫軍將節級軍人百姓等



共賜錢一十萬貫以見在東都諸道上供物充委全忠分給其軍將仍委具名銜聞奏量材酬獎又應自陝州執事掌儀仗隨駕馬軍及樓下立仗將士等共賜錢五萬貫以見在東都錢充應内外文武嘗參官節度觀察防團刺史並與追贈追封先已有者更加封贈其諸道藩鎮牧守并委中書門下第其功績進改處分禮儀使御營使各與進階

後唐莊宗同光元年四月卽位改元大赦應六軍及行營馬步蕃漢諸道將較并賜功臣未有官者超一資與簡較官已有官者亦超一資如官已高者與加

爵已如曾封爵者仍給一子六品正員官其長行兵士並賜功臣應將士等並勒逐處各等第優賞

二年二月己巳朔南郊禮畢大赦應自來立功將較兵士等皆久經戎陣備親辛勤並宜各轉官資仍加賞給應南郊掌儀仗隨賀官員及樓下立仗將士及河南將較兵士等亦各賜等第優賞應藩鎮使臣各賜一子出身仍封功臣各號諸道留後刺史官高者加爵一級官卑者加官一資

三月辛亥詔隨駕收復汴州及扈從到維及南郊立仗都將已下至節級長行軍將等朕自荆平中夏掃



蕩群凶被介冑以征行歷星霜而扈從凡經百戰盡  
立殊功永念丹心真同赤子若無旌賞豈表恩榮其  
都將官自司空已下者宜並賜協謀定亂佐國功臣  
自僕射尚書嘗侍至大夫中丞宜並賜忠勇拱衛功  
臣其初帶憲銜宜並賜忠烈功臣已有功臣名者不  
在此限其節級長行軍將並宜賜扈蹕功臣又詔昨  
皇太后爰自北京歸於大內旋膺典冊正位宮闈載  
詳邦國舊規合有命婦貢表宜稽邃古以示新恩應  
內外文武官妻可據品秩高卑各封邑號

明宗天成二年五月勅朕自恭承景運祇荷丕圖念

寰海生靈錄勲賢骨肉保家莫尚於孝報國莫大於  
忠忠孝兩全古今所重在朝文武臣寮并諸道節度  
刺史等有父母者宜徧加恩澤使天下爲人父者知  
感爲人子者知恩競揚家國之風顯著君臣之道  
三年正月己丑先准天成二年五月十二日勅中外  
臣寮及諸道節度使等有父母者並許加恩奉勅凡  
居臣下盡抱公忠共爲朝廷各榮家族具慶者繼頒  
恩渥俾耀晨昏旣亡者宜漏泉扃以光封樹應中外  
群臣及諸道節度防禦團練刺史等父母亡歿者並  
與追贈加封



四年二月北面馳報今月三日收復定州舉酒徧賜侍臣喜除腹心之疾賜教坊絹五百疋內臣進馬稱賀丙午百辟入賀馮道從容言曰元惡旣除猶望陛下安不忘危卽太平非遠戊申宴群臣於玉華殿樂作王晏球馳報已獲王都首級生禽契丹禿飯等二千餘人百官就班稱賀崔協酒酣不能并蹈踣於地命左右掖之方輿不久協卒宴罷賜物加等

長興元年二月郊禋禮畢下制曰朕恭荷丕圖獲申大禮蓋股肱之叶力環衛之輸忠將士等扈從乘輿警蹙晝夜咸彰勞瘁深所嘉稱各示頒宣以明酬獎

宜令三司依等第勘會指實人數指揮支給其諸道州府如本處有絹帛准價折支無見在錢物卽就便支遣兼差使臣各往逐處宣賜仍下六軍諸衛准此告諭是月宴群臣於長春殿百寮各賜鞍馬銀器分物有差酬郊祀行事也五月丁丑詔賜皇后册禮使馮道副使兵部尚書盧質錢絹衣著銀器鞍馬有差三年正月白波新脩軍營帝駕幸觀之稱旨賜部署軍吏等物有差八月戊申受册尊號庚戌以馮道撰玉册文李愚書寶劉昫書册各賜絹二百疋銀器百兩秦王從榮延光延壽各賜絹五百疋銀器百兩金



帶一銀鞍馬一宣徽使馮贇孟漢瓊絹三百疋銀器百兩鞍轡馬一匹客省使宋敬瑭樞密直學士李崧絹百疋蓋盃一侍衛指揮使康義誠已下三人六軍統軍李從昶已下六人各賜錢二十千諸軍都指揮使人各十五千諸軍指揮使人各十千副指揮使人各七千都頭人各五千副兵馬使人各四千親直捧聖等散指揮使嚴衛軍將等人各三千龍武神武羽林六軍馬步兵士人各二千雜作諸軍將士人各一千徽號赦後恩賞也又賜侍衛都將康義誠絹二百疋馬一匹馬步都將安彥威張從賓各絹百疋馬一匹捧聖嚴衛都將宋洪實皇甫遇絹各百疋

十月丙寅勅曰朕聞君臣一也善否同之比之於人心安則體逸方之於木枝盛則葉繁朕自父天子民宗文祖武輔弼上憑於廊廟獻替次賴於縉紳四海無波敢自矜於清晏一人有慶思共樂於雍熙近又允副群情增崇大號雖中外元輔已議序遷而文武庶寮未聞普及而况咸著恪居之績悉堅欣戴之誠將顯示於獎酬當廣頒於渥澤應在朝文武臣寮並宜加恩其有八月四日已後遷官者不在此限時帝欲徧與百寮轉官而馮道等以爲轉官須論資考乃



奏叙階勲而已

愍帝以長興四年十一月癸卯卽位己酉詔中外將士賜物有差

應順元年正月改元諸藩鎮文武臣寮皆次序加恩帝嗣位覃慶澤也是月宴將相百寮於廣壽殿賜幣馬有差二月詔兩班嘗參官各加階進爵從改元赦書恩例也

末帝清泰元年四月卽位大赦應內外文武臣寮節鎮州府等使刺史文武職員將較並與加恩應自鳳翔扈駕員寮凡主兵主事者各賜功臣名見在京隨

駕并諸道馬步將士并與等第優給并從別勅處分隨駕前資文武官寮并量材任使是月詔禁軍鳳翔城下歸明將較賞給龍武都指揮使安審琦羽林都指揮使馬萬楊思權嚴衛都指揮使尹暉各二馬一駝錢七十貫諸軍廂指揮使壕寨使各一馬一駝錢五十貫諸軍指揮副指揮使一馬一駝錢四十貫軍使都頭一馬錢三十貫諸軍軍使副兵馬使至長行契丹直錢三萬軍頭十將至軍人各十貫其元在京城守營及新招軍都人廂軍十將至官健各錢十貫又詔曰愿勸進諸選人前京兆府武功令龐濤而下



四百九十有四人方在京都邁茲際會既同勸進宜示獎勵其前資州縣官及黃衣進選人近日緣少闕員難於臧選候合格日各超一資注擬行事官亦於注擬時優與處分長流人已歸本貫卽以赦書節文處分攝試官推巡令錄宜并許比三轉出身判司衙推主簿比明經出身各守選限自今年始合格日與初官宗子未有出身者與出身有出身者同選人例處分給與憑據

七月詔鄭州防禦使宋敬塘宿州團練使潘環潁州團練使孫鐸亳州團練使康文審洛州團練使田武密州刺史張錢郢州刺史武廷翰懷州刺史周光輔商州刺史侯益并叙進爵邑從恩例也文武兩班崔居儉而下一百七十有一人各轉階一級或賜勳一轉或進爵一等示新恩也

晉高祖天福元年十一月己亥卽位于北京大赦改元詔曰文武官寮等各輸推戴之誠宜示獎勵之道應在京文武官寮及軍府將較并勸進官等兼前資官內自五月後來未曾分掌職任并各與遷轉官資自五月後已來曾受官者不在此限其軍府諸色職掌將吏等已及押衙職者并與加官未及押衙職者



各與遞遷職次應超魏府行營及係侍衛諸軍將校等并已加恩外所有六軍及諸道本城并替換在諸處將較未加恩者凡執干戈皆爲社稷雖守役或分等次而傾心盡著勤勞且被渥恩各升官秩用獎輸忠之効俾堅禦侮之誠其六軍及諸道州府本城并替換在諸處將較未加恩者宜令并與依資轉官仍令六統軍及諸道州府據前項軍都自副將已上分折各銜申奏是月甲申至雒都壬午詔曰賞罰二柄激勸萬方儻稽甄獎之恩何荅勤劬之効應扈駕及相州歸順軍都並與重加優賞但緣宮內燒焚庫藏

虛乏宜令三司疾速抽徵諸道稅物以充賞給其指揮使節級等并與超轉官資五月後來已曾授恩命者亦與依資轉官高懸朗日臨照必被於遐陬大扇仁風亭育罔遺於纖芥應天下歸順節度使刺史下賓席郡職及將較等委中書門下各與改轉官資二年正月庚申詔曰有晉開國新命臨人宜弘不二之規以廣無私之化應在朝中外臣寮及節度團練防禦使刺史留守司及州府縣官等宜并與加恩擢林委任不問常例

十月勅應追尊四廟行事官等追尊四廟式展盛儀



行事庶官合頒溥澤貴承光寵共贊孝思宜令銓司  
准元勅磨勘如守選年深過格及已合格指受赴任  
不得并次一選兩選者先與注官加欠三選四選月  
限不滿衝替下許非時注擬者卽相次注官仍頒各  
依資序如不依元勅指揮欠選數多者卽仰都具奏  
聞

三年四月諸道藩侯郡守皆等第加恩

六年八月己亥帝至鄴都壬寅制經過郡縣迎奉乘  
輿旣供億以爲勞宜旌酬而示寵應自東京至鄴沿  
路供頓官員職掌等並與加恩載念崔臺昔居侯服

撫綏六郡臨蒞四年倦彼職員依然父老無檢推恩  
之典仍教尚齒之風鄴都並相澶貝博衛等州官員  
職掌內有項歲潛龍時在職者并與加恩管內耆老  
八十已上者並與版授上佐

少帝以大福七年六月乙丑卽位丁卯賜侍衛諸軍  
將較錢一百貫至五十貫以初卽位示大賚也

七月庚子御正殿大赦內外臣寮侍衛諸軍將較及  
諸道節度使防禦團練刺史及諸道賓幕將較職員  
見任京官六品已下州縣官三司場院監治帶使額  
者並與加恩其諸道職員押衙已下與轉官兵馬使



已下與轉職致仕官前任文武朝臣內諸司使已下前任節度使防禦團練刺史行軍賓從少尹上佐官前諸道都指揮使已下前任京六品已下官及前資州縣官帶使額場院官等並與加恩應在京諸司職掌亦量與恩澤

八年七月丁酉幸南莊宣隨駕臣寮射于後園賜酒食物帛有差沿路農人各賜布衫袴并鞋貧子共賜錢一十貫文

開運二年正月辛亥宴青州立功將較於永福殿賜李守貞符彥卿玉帶衣一襲衣著銀器鞍轡馬都監王景崇護聖廂主楊實都指揮使斬霸等各等第賜金銀帶衣服疋段銀器等

漢高祖開運四年二月辛未卽位於北京猶稱天福十二年是月戊寅以內外府庫賞犒諸軍將士有差甲午賜北京管內郡縣官員職掌各加階級乙酉北京管內及諸道相次有前資官六千七百人詣闕稱賀帝面加賚以遣之

六月甲子至東京戊辰大赦內外臣寮及京百司并諸道官吏將較等各具名銜申奏當與加恩

乾祐元年正月乙卯大赦改元應扈從鄴都文武臣



察及諸軍將較并在京都署巡簡官員職掌諸軍將較等除已行恩命外所有未曾加恩者宜令中書門下條舉聞奏兼鄴都已來緣路州縣迎奉大駕供饋宿項糧草無遺闕處其職掌及州縣官吏並與等第甄錄

隱帝以乾祐元年二月辛巳卽位癸巳大赦應中外文武臣寮將吏各加恩寵其馬步諸軍兵士等各加賞給

周太祖廣順元年正月丁卯卽位改元詔馬步諸軍將士等各與等第超加恩命仍賜功臣名號已有功臣者別與改賜内外文武臣寮致仕官諸軍將較隨使職員及前任藩侯郡守文武朝列前内諸司使副使前禁軍指揮使前資行軍副使等各與等第加恩世宗以顯德元年正月南郊大赦内外馬步諸軍將士各等第優賞應見任内外文武職員諸軍將較致仕官節度防禦團練刺史前任文武外朝官前内諸司使副使前諸州行軍副使前指揮使諸道進奉尊人前資官赴郊廟陪位者并與加恩内外命婦并與追封因夫子叙封者不得過夫子本品其諸寺監攝官如滿七周年已上應奉公事無遺闕文書灼然者



並與同明經出身應祇應郊廟職賞人員並與恩澤其行事官已勘無違碍者候銓司移省各與除官合來年集者候將來授任仍並加一階欠三選至五選者減一選欠六選已上減兩選幕職并與減一年如欠月限不及一年者便與除官仍轉官資其諸色選人駁放皆依格勅其間小小違碍可以情恕者并條奏以聞起今後升朝官兩任已上著緣十五周年者與賜緋著緋十五年者與賜紫凡州縣官歷任內曾經五度參選者雖未及十六考與授朝散大天階年七十已上合授優散官者并賜緋其非時特恩不拘此

例是月賜將相近臣主軍職員及郊裡冊尊號行事官等第分物

三月丁丑賜宰臣樞密使及諸軍都較鞍馬金玉帶衣服各有差辛巳大赦內外見任文武職官致仕官及諸軍將較并與加恩其前任京官幕職州縣官至合授官日施行

四年三月戊子朔帝在淮南宴文武從官於行宮賜招討使李重進都監向訓等窄衣玉帶金銀器繒綵鞍馬噐甲等又賜諸將及行營軍士分物各有差



